

08/10/1997

Pasaran modal BSKL merosot 35 peratus

PASARAN modal Bursa Saham Kuala Lumpur (BSKL) merosot sehingga 35 peratus berikutan kelemahan nilai ringgit dan pelabur hilang keyakinan, kata Timbalan Menteri Kewangan, Datuk Dr Affifuddin di Dewan Rakyat.

Bagaimanapun, katanya, masih terlalu awal untuk menganggar jumlah kerugian yang dialami oleh pelabur tempatan dan asing.

Beliau menjawab soalan tambahan Tan Kok Wai (DAP-Cheras) yang ingin mengetahui jumlah kerugian yang dialami oleh pelabur asing dan agensi kerajaan berikutan kelemahan pasaran saham BSKL.

Affifuddin berkata, pelabur asing menguasai 12 peratus atau RM70 bilion ekuiti BSKL.

Terdahulu, Affifuddin berkata kerajaan sudah mengambil langkah jangka pendek dan panjang bagi mengatasi masalah membabitkan pelabur asing yang hilang keyakinan, dalam usaha mengekang kejatuhan lebih buruk di BSKL.

Beliau menjawab soalan Datuk Lim Si Cheng (BN-Senai) yang bertanya mengenai langkah kerajaan bagi membantu pelabur yang menghadapi masalah akibat kejatuhan mendadak harga saham September lalu berpunca daripada manipulasi berterusan dalam pasaran saham dan pasaran mata wang oleh asing.

Affifuddin berkata, antara langkah pendek yang diambil termasuk pertemuan antara Perdana Menteri, Datuk Seri Dr Mahathir Mohamad dan Timbalannya, Datuk Seri Anwar Ibrahim, dengan pengurus dana tempatan dan asing.

Di samping itu, katanya, pengurus kewangan tempatan juga digalak supaya membeli saham di BSKL dengan jumlah yang besar untuk menyokong dan menyekat kejatuhan pasaran saham dengan lebih teruk.

Bank Negara, katanya, juga mengenakan had ke atas tukaran ringgit bukan komersil oleh pelabur asing kepada AS\$2 juta untuk menyekat spekulasi ringgit.

Sementara itu bagi langkah jangka panjang Affifuddin berkata, ia termasuk menangguhkan projek mega, mengkaji semula semua projek penswastaan, mengamal penjimatan dalam perbelanjaan kerajaan dan arahan supaya semua pegawai kerajaan menukar kereta kepada jenis Proton.

(END)